

**Pita
Ina Giruma Karena
(1 Peter)
Vonaviakova**

Pita igiruma Keresiyana kurisi, ti na ivi verubogebogesi da Eisiya Maina dobuna kamonai ivivi makiyyana, ma ivonesi da ti na God ina wawaya vovinesi. Igiruma da ita kiiepepsi iyamna i vitumaghana kubiine wawaya ivivi tupaketowanesi da ivovokwarakwara. Ivonavinotisi da Yesu Keriso varana biibiina ke nuwanuwasi ina wapa ma ivonesi da ikikava Yesu irabobo, ivomiiri ma vonakiyapa bagibagina iterei da ina vovira ku dobu na nota rewapana ina veresi. Ivonesi da weni notasi tepanai na ini vaghinei da vokwarakwara kamonai ina miirkikina ma inakovi da nani nuwapoyisi na eruburubusi da itumaghana vaghata bo kegha. Ma inakovi da mara sago Yesu ina vovira ku dobu na kii miiya makamakii nonowina ina veresi.

Pita ikiiepepsi da nuwapoya kamonai i nota ini rewapana ma bade kurisi ivi nowi kirakai da i yawasa manininai ini matakira da ti na Keriso rapenai.

Pita ina nota weni nakanani irereghi.

Sapta 1:1-2 Giruma ivotawei.

Sapta 1:3-12 Ivonavinotisi da God ivi yawasisi.

Sapta 1:13 da ku 2:10 Vinowi da yawasa manininai ita makai.

Sapta 2:11 da ku 4:19 Keresiyana ikikava ita makai i vokwarakwara kamonai.

Sapta 5:1-11 Keresiyana ita tereoruwe meyesi ma wawaya kubiisi ita biga.

Sapta 5:12-14 Vikiikiwa ma giruma igudu.

1 Taku Pita, Yesu Keriso* ina aposol.

Tami iyavo kava God ivovinem da ina wawaya na agirugiruma kurimi. Rorova ku dobu bogii ma bogiiyai kovi verubogebogemi da iyavo kava ke itakovimi na kamosiyai koimakiiyana. Karako tami na Pontas, Gareisiya, Kapadosiya, Eisiya ma Bitiniya dobusi kamonai. **2** Ita Mamai God ina kayowanai ivinemi ma Kanuma Vovokaravina iberimi da tami ina wawaya vovokaravimi. Tuna kubiine na Yesu Keriso kovotekatekei da taranai ikowatawemi.

Ainowi God kurina da ina agabiibai ma ina nuwanuba gwabimiyai ina rakata kirakai.

Tatumatuma da God yawasa makamakii nonowina ina vereta.

3 God tighegheni, tuna ita Bada Yesu Keriso ina Mamai. Ivi kamyuyuwa kirakiiyeta da yawasa vuna ivereta da tatupuwame. Iberai da Yesu Keriso rabobowai ivomiiri, tuna kubiine nimonimoriyai tatumatuma da **4** buder makamakii nonowina kunumai kubiita ivovunaghi na taviliya. Tuna buderina na ke ina raruwa ma ke ina bero ma bade ke meyani da tiwapai. **5** Ami vitumaghana kubiine God ina rewapanai ini tarapaparanemi ina nena da ku mara damona. Ma nani maranai yawasa makamakii

* **1:1:** Keriso: Grik damsi gamosi evonavona bo ‘Keriso’ ma Hibru damsi gamosi evonavona bo ‘Mesaya.’ Ivi ruwa iyamna ‘God ina Vivinevine Wawayina.’

nonowina ini debei na ina vibiibiina kudubina kona vii yavui.

⁶ Tuna kubiine kovi nuwabiibii kirakai! Namanaki da mara gisina nuwapoya ma vokwarakwara bogii ma bogiiyai kopanapananai ma kegha da kovi nuwabiibai. ⁷ Nani nuwapoyisi enenekiibau kurimi na ini debemi da ami vitumaghana na vitumaghana vaghata bo kegha. Nakanani ma gold wakimina ita karavunaghi da muguna ita kara yavui ma gold kava ita makamakai. Ma gold na mura ghamana dobuwai ma kegha da mara damona ina wapa. Ma ami vitumaghana iyamna irakata da gold ighekuyowei. Ami vitumaghana ini rewapananai maranai Yesu Keriso ina mara ghamana ina nekiibau, vigheghena ma kadara ma vokarava kona viiya. ⁸ Tami na ke meyani Yesu Keriso kota kitai ma kegha da yavata kovi nuwaviina. Ke wekarakava matamiyai kota kitakitai ma kegha da koitumaghanei. Tuna kubiine ami nuwabiibai na ghamanakina ma notakavakavana, ⁹ iyamna ami vitumaghana kana miiya na kanumimi yawasa makamakii nonowina ina viiya.

¹⁰ Yawasa makamakii nonowina tisisiyei. Peroperoveta akova God gwabinai iviiya da mara sago ina agabiibai ini debei kurimi da nani yawasina ina verotemi. Ivi sisiyei ma nuwanuwasi kudubinai akova ku tepana iekwekwa, ¹¹ iyamna ke itakova bubuna da ikikava ma meni marasiyai weni berasi ita tupuwa. Keriso Kanumina gwabisiyai imakamakai na ivi debei kurisi da mara sago Keriso ina vokwarakwara ma nani murinai kana kadara kamonai ina makai. ¹² Ma

bade ivi debei peroperoveta kurisi da aviyavisina igirumi na ke ti kubiisi ma tami murina kimtina kubiimi. Ma karako na dima wawayisi weni berasi ivi mamatarei maranai Keriso varana biibiina idimei kurimi. God ina Kanuma Vovokaravina ivonatawei da kunumai ioru da tuna ina rewapanai na wawayisi idima. Ma bade aneya yavata i kayowana ghamana da weni berasi itakova bubuni.

Yawasa maninina kamonai tamakai.

¹³ Tuna kubiine, wekarakava ami nota koreregha bubuni ma kovovunagha da nota manininai koni potepote meyemi. Ami nota evi rewapanai ma nimonimoriyai kotumatuma da God ina agabiibai ini debei kurimi maranai Yesu Keriso ina nekiibau. ¹⁴ Tami God natunatuna, tuna kubiine kovotekatekei. Rorova na neghaneghami da ami kayowana beroberosi ivivi bademi. Ma karako na nani ketana ke kona kivini. ¹⁵ God na maninina ma vovokaravina ma tuna ikwatumi. Tunā kubiine koberai da ami yawasa na vovokaravina ma maninina kavakava. ¹⁶ Giruma katamana kamonai God ivona bo, “Taku vovokaraviku, tuna kubiine koberai da ami yawasa na vovokaravina.”*

¹⁷ Mamai God kurina koniponipowana ma tuna na vonavaghata tepanai wawaya sago sago duma i bera itupavirevirei da biibiina bo berona. Weni dobunai tami na numataya, tuna kubiine ami yawasa kamonai na God kona yabumanei ma kona vokaravei. ¹⁸ Ami kaekiki mau i yawasa kwebuna ivi damani kurimi da

* **1:16:** Lev 11:44-45, 19:2

rorova nani yawasina kamonai komakamakai. Ma koakovi da aviyavisinai God ivi miiyei da nani yawasina kamonai ivotawemi. Ke silva bo goldiyai iti miiyei. Ti na dobu kana mura ma i yawasa na tupona ma ina wapa. ¹⁹ Kegha, Keriso tarana biibii kirakiinai ivi miiya kubiimi da igimaratawemi. Isuwara nakanani ma sипу gegeyina biibiina, ke sago berona bo gubaga gwabinai. ²⁰ Muriyai da dobu ita yamoni na God namada ina nota irereghi da kubiimi na Keriso ivinei da iti suwara. Ma karako da ku mara damona, weni marasi kamonai na tami kubiimi Keriso ivokiibuwei ku dobu da wawaya kudubisi ikitai. ²¹ Keriso kubiine na God kovi tumaghanei. Ma God iberai da rabobowai ivomiiri ma muriyai kadara iveresi. Tuna kubiine karako na ami nota rewapani ma ami vitumaghana na God ina kina kava gwabinai ina makai. ²² Tami namada vonavaghata kovovotekatekei da nuwanuwami na yagharisi, tuna kubiine namada nuwanuwami kudubinai Keresiyana turaturami yavata koinuwaviinavivirana. Ma ainowi kurimi da ami nuwaviina ina rakata kamowa, ²³ iyamna tami na kotupuwame. Ami yawasa vuna na ke ami mamai ma ami maduwa gwabisiyai kota viiya. Ti na yawasa dobuwai iveremi ma damonai na rabobo. Ami yawasa vuna na ke nakanani, ina damona kegha, iyamna God vonana na yawayawana ma makamakii nonowina ma tuna iberimi da yawasa vuna kopanani. ²⁴ Giruma katamana ivona bo,

“Wawaya kudubisi dobuwai i yawasa nakanani
ma inamona,
ti nakanani ma inamona tanana dipiiyai,

mara tupona kava kitasi ibiibii kirakai.
 Ma ke gurina na inamona ina sivi
 ma tanana ina ririgha,
²⁵ ma kegha da Bada Vonana na makamakii
 nonowina.”*
 Ma vonana na Keriso varana biibiina ma tuna
 wawaya idimei kurimi.

2

Ita Bada na wakima yawayawana.

¹ God vonana kovi tumaghanei kubiine, ke koni kayotirana. Sisiya vibero, miiriruwaruwa, nuwakapi ma viavabero na kudubina kovoterei.
² Ikikava gegeya ina kayowana ghamana da ita susu na nakanani kanumimi kana okowa miirarina kota kayowana kirakiyei. Konumumai da nota magurimi ina terei ma yawasa makamakii nonowina kamonai kona gogo, ³ iyamna namada Bada ina agabiibai damina koviyya da ibiibii kirakai.* ⁴ Bada Keriso na wakima yawayawana. Wawaya wakimina ibarei ma kegha da God nani wakimina ivinei na kurina ibiibii kirakai. Koriyemi nani wakimina yawayawana kurina, ⁵ iyamna tami bade na wakima yawayawami. Ma God iviinimi da Kanumina ina taparoro numana evowavowai. Ma numana kamonai na tami nakanani ma taparoro babadimi. Tami na vovokaravimi ma ami biga da kanuma ina ku nevaneva God kurina ami vokavakavara kona verena. Ma Yesu Keriso avanai God ami suwara ini nuwabiibiyei. ⁶ Giruma katamana kamonai God ivona bo,

* **1:25:** Isa 40:6-8 * **2:3:** Psa 34:8

“Wakima biibiina avinei
 ma Zayon koyana tepanai nani wakimina
 aterei da kwanatu vuna avi karei.
 Ma iyavo kava wakimina ini tumaghanei na
 ke meyani da ina kitatawesi.”* *

⁷ Vonavaghata, tami iyavo kava wakimina koitumaghanei na kurimi iyamna irakata kirakai. Ma iyavo kava ke ita vivitumaghanei, ti na weni damsí nakanani,

“Vonura damsí wakima ibarei.
 Ma Bada nani wakimina iviyya ma iterei
 da tepanai numa vuna ivowai.” *

⁸ Ma bade giruma katamana evonavona bo,
 “Tuna nakanani ma wakima da wawaya kaesi
 ina takurei,
 wakimina ini gampiirisí da ina peku.”*

Wawayisi God vonana ke ita votekatekei tuna kubiine gampiira epanapanani. God namada iakovi da ke ini tumaghana ma iakovi da damonai aviyavisina ina tupuwa kurisi. ⁹ Ma tami na ke nakanani. God ivinemí da ina wawaya. Tami na taparoro babada ami Kiivavo kubiine. Tami na dam vovokaravimi. Ma tami na God rapenai. Ivinemí da tami nubakutuva kamonai ikwatumi kokiibau da ina ku yasegana biibiina korui. Tuna kubiine debiiyai God koni ghegheni.* ¹⁰ Rorova na tami ke God ina wawaya, ma karako na tami ina dam kamonai. Rorova na God ina vikamyuyuwa damina ke kota viiya, ma karako na ivi kamyuyuwemi.*

* **2:6:** Zayon koyana na Jerusalem kamonai. * **2:6:** Isa 28:16

* **2:7:** Psa 118:22 * **2:8:** Isa 8:14-15 * **2:9:** Exod 19:5-6; Isa 43:20, 21; Deut 4:20, 7:6, 14:2; Tait 2:14; Isa 9:2 * **2:10:** Hos 2:23

Babada tayotekatekesi.

¹¹ Turaturaku, tami na nuwanuwaku. Dobuwai tami na numataya ma tami na dobu viruwa wawayimi. Tuna kubiine ainowi kurimi da tupuwa ina kayowana beroberosi kobarei, iyamna nani notasi kanumimi ikawapatei.
¹² Wawaya ke vivitumaghanisi kamosiyai komakamakai, tuna kubiine kokitaruvimi da ami yawasa na maninina kavakava. Mikeda i kayowana da iti wavumi da berabero wawayimi na ina bera kavai, iyamna ami bera biibiisi ina kitai. Ma God kana kadara ini ghegheni maranai ina nekiibau da ini tupavirevireta.

¹³ Bada ina kayowana da babada peyarisi ma kiivavo ghamana ami dobuwai kona votekatekesi.
¹⁴ Ma bade iyavo kava kiivavo ghamana gwabinai rewapani iviiya da ini bademi na kovotekatekesi. Ami kiivavo dobuwai ivonatawesi kurimi da iyavo kava kamomiyai bera beroberosi ina berai na kovogha ina veresi ma iyavo kava bera biibiisi ina berai na ini gheghenisi. ¹⁵ Ma tami na God ina kayowana da bera biibiisi kava kona berai. Wawaya neghaneghasi ikawapatemti ma ami yawasa maninina ina kitai na sisiya wapawapa ina voterei ma kawasi ina pota. ¹⁶ Ami yawasa kamonai na vovotawemi. Ma ke kona notai da taraboga evereveremi da gavunai berabero kona berai, iyamna tami na God ina bigabiga.
¹⁷ Wawaya peyarisi kovopepetisi. Keresiyana turaturami yavata kovi nuwaviinavirana. God kovokaravei ma kiivavo ghamana ami dobuwai kovopepetei.

Keriso ina vokwarakwara ivi matakira kurita.

18 Bigabiga wawayimi na ere vopepetimi ami babada i rewapano gaburisiyai komakai bubuna. Ami babada biibiisi ma nuwapikapikasi bo ami babada beroberosi ma nuwaghakighakisi ma kegha da mara nonowa kona vovotekatekesi. **19** Ma mikeda ke sago berona kota berai ma kegha da ami bada ini wavumi ma kovogha ina veremi na God ina kayowana kovotekatekei da ere nuwanubami kona miirikikina ma ke kona weno. Ami votekateka kubiine na God ini biibiinimi. **20** Ma koakovi da mikeda berabero kona berai ma ami bada kovogha ina veremi ma ina widimi boni na damidamina, God ke ini gheghenimi. Ma mikeda bera biibiina kona berai ma kegha da ami bada kovogha ina veremi ma ami vokwarakwara kamonai ere nuwanubami kona miirikikina na God ini biibiinimi. **21** Weni yawasina kubiine God ikwatumi da ikikava Keriso ere nuwanubana ivokwarakwara kubiimi na ivi beyemi da tami yavata vokwarakwara kamonai ere nuwanubami kona makai. Ivi nao, ivi matakira kurimi da nani ketana kota kivini. **22** Ke sago ina berona avai ma ke sago sisiya vibero kawanai ita kiibau.* **23** Wawaya ivi avaberowei na ke iti avaberowesi. Ivokwarakwara ma kamonai na ke ita vonesi da karakava biwana ita viiya. Ina nota God kurina iterei da mara sago tuna wawaya ini tupaviresi ma vonavaghata tepanai ina vonakiyyaragha da iyi berona ma iyi biibiina.* **24** Keriso tuna mani ita berabero vitana tupuwinali ikavari da korosiyai irabobo. Weni berana iberai da kubiita berabero ina ruyagha damina ivi rabobo tuwanonowi da ke ini nuwatinita ma ita yawasa na maninina

* **2:22:** Isa 53:9 * **2:23:** Isa 53:7

kavakava. Keriso iwidiya ma ina ku inivisi na ivi yawasimi.* ²⁵ Rorova na tami nakanani ma sipu siwasiwanimi, kobababa wapawapa. Ma karako na kovovira kami koyakoyagha kurina ma tuna ami nota, kanumimi ma nuwanuwami kii papara evowavowai.*

3

Tatavinesi kii sisiya.

¹ Wivine, tami bade kakawami kovotekatekesi da i vibadana gaburinai komakai. Ma mikeda kakawami God vonana ke iti tumaghanei na ke kona darusi da ini tumaghana. Ami yawasa maninina ina kitai na nota ina viiya da vitumaghana ini karei.* ² Tuna kubiine ami yawasa kamonai mara nonowa God kona vopepetei ma nuwanuwami yagharinai kona makai. ³ Ke koni nuwapoya kirakai da kitami biibiisi bo kegha. Ke kona notai da uyawimi piropirosi bo kami posaru bo kami yodi bo kami gara biibiisi ina berimi da koni karawata.* ⁴ Kegha, karawata vaghata na nuwanuwami kamonai emakamakai. God nuwanuba ma vokuwaya ami yawasa kamonai ina kitai na kurina ibiibii kirakai ma ina notai da tami na karakarawatimi. Tuna na karawata makamakii nonowina. ⁵ Mara katamaninai wivine vovokaravisi na God ivivi tumaghanei ma kakawasi ivovotekatekesi. Nani berasi iberaberai da ti na karakarawatisi. ⁶ Sago na Sera. Ivonavona da kawana Abraham na ina bada ma ivovotekatekei. Iyavo kava bera

* ^{2:24:} Isa 53:5 * ^{2:25:} Isa 53:6 * ^{3:1:} Epe 5:22; Kol 3:18

* ^{3:3:} 1Tim 2:9

maninisi koberaberai ma ke kota yabuyabumana,
tami na Sera natunatuna.*

⁷ Ma tomotomowa na bade berana sago koberai,
kakawami kodogara bubunisi ma kovopepetisi
iyamna i rewapana ke ita rakata, ma ti na kami
neva. God ina puyo kona vii patapatai, tuna
puyona na yawasa makamakii nonowina. Ma
kakawami yavata kona vivimakiherowana na God
ami nipowana ke ini yanei.*

*Biibiina taberaberai ma kegha da nuwapoya
tapanani.*

⁸ Ma vaghina, kudubimi kami sisiya na weni.
Kovi nuwasago, turaturami kovi kamuyuwesi ma
kovi nuwaviinavivirana. Kotereoruwe meyemi
da ami bera kudubina na ere voyaghotimi
ma wawaya kurisi ami agabiibai kovi debei.

⁹ Wawaya berabero ina berai kurimi na ke
beronai kona kovoghi. Wawaya ini avaberowemi
na ke koni avaberowesi. I berabero na biibiinai
kokovoghi. God ivinemda nakanani kona berai.
Kona votekateka na ini biibiinimi. ¹⁰ Giruma
katamana evonavona bo,

“Iyi tam kekayokayowei da nuwabiibiiyai
kuna makai,
Ma am kayowana yawasa biibiina,
na ke kuni bero,
ma sisiya beroberosi ke kuni sisiyei.

¹¹ Berona kevoterei ma biibiina keberai,
Nuwanuwam kudubinai keberai da
ere nuwanubami am wawaya yavata
kona makai bubuna.

* **3:6:** Gen 18:12 * **3:7:** Epe 5:25; Kol 3:19

12 Mara nonowa Bada matana na ina wawaya maninisi ekitakitisi ma i nipowana iyanei.

Ma iyavo kava berabero eberabera na Bada etatakuputesi.”*

13 Nimonimoriyai bera maninisi kava kona berabera na wawaya ke berona ina bera kurimi. **14** Ma mikeda ami bera maninisi kubiine kona vovokwarakwara na Bada ini biibiinimi. “Ke koni nuwapoya ma ke kona yabumana.”* **15** Ma nuwanuwami kudubinai Keriso kovokavakavari ma kovi vaghinei da ami yawasa ini badei. Mara nonowa kovovunagha da maranai wawaya ini tarakiyanemi da avi kubiine ami vitumaghana ivi rewapana na namada koakovi da ikikava kona vonapotesi. **16** Kona vonavonapotesi na ere vopepetimi ma ere nuwanubami koni sisiya kurisi. Ma bade koberai da nuwanuwami yagharia. Ma iyavo kava ini avaberowemi na ininimaya, iyamna ina kitimi da Keriso kokivikivini na ami yawasa maninina kavakava. **17** Mikeda God ina kayowana da kata vokwarakwara na bera biibiisi kubiine vokwarakwara damina kata viiya ma ke bera beroberosi kubiine. **18** Ma Keriso irabobo mara sago kava da ami berabero kudubina ivi kovi tuwanonowi. Tuna na wawaya maninina ma tami na berabero wawayimi ma kubiimi irabobo da irutinimi God kurina. Tupuwina irabobo ma kegha da God Kanumina ivi yawai. **19** Ma nani Kanumina ina rewapanai Keriso ioru da wawaya kanumisi gabura kamonai na kurisi varana biibiina idimei.

* **3:12:** Psa 34:12-16 * **3:14:** Mat 5:10; Isa 8:12-13

20 Ti wawayisi na iyavo kava Nowa ina mariyai God ivivi kawakiikiyei. Nowa waka ivowavowai ma God ere nuwanubana ivivi koyakoyagha da wawayisi i berabero iti nuwapoyei ma kegha da wawayi ivi 8 kava igeru da okowa kamonai ivi yawasisi.* **21** Ma nani okowina na ivi matakira da karako babataito emakamakai da tami bade okowai ivi yawasimi. God ina rewapanan iberai da Yesu Keriso rabobowai ivomiiri ma nani rewapaninai ivi yawasimi. Ma babataito na ke tupuwimi dowadowana kowatawena kubiine. Kobabataito na tuna ami vinowi God kurina da nuwanuwami ina kowatawei da ina yaghari. **22** Ma Keriso na ighae ku kunuma da God katagheyenai emakamakai. Ma karako na aneya, kiikiivavo kunumai ma kanukanuma i babada na kudubisi tuna ina rewapanan gaburinai emakamakai.

4

God kubiine tamakamakai.

1 Keriso inivisi damina iviiya, tuna kubiine ami nota ini rewapanan ma mikeda ami vitumaghana kubiine nakanani ina tupuwa kurimi na kovi vaghinei. Iyavo kava ini vaghinei na tuna wawayina ivi debe meyei da berabero ivoterei. **2** Ma ina yawasa dobuwai na ke tupuwa ina kayowana beroberosi ina kayokayowei, ma Bada ina kayowana kava ina beraberai. **3** Rorova dobu yatasina kobera kirakiiyei da tami nakanani ma iyavo kava Keriso ke ita vivitumaghanei. I yawasa kamonai na bera dowadowasi eberaberai da tupuwisi irekwei, ekamkamporagha ma

* **3:20:** Gen 6:1-7:24

kamonai na eumuma neghanegha ma vipekana wapawapa eberabera. Ma bade sawara yamoyamonisi kurisi evovokavakavara, tuna berana na ibero kirakai. ⁴ Ma karako na ti damsi ideyemi da ke i bera dowadowasi ku kamona kota rurui da yavata kota berabera, tuna kubiine ivi karei da iavaberowemi. ⁵ Ma konotai da mara sago ti na God maghinonai ina miiri, iyamna tuna namada ivovunagha da wawaya yawayawasisi ma raborabobosi kudubisi ini tupaviresi. ⁶ Tuna kubiine Keriso varana biibiina na ke yawayawasisi kava ma bade raborabobosi kurisi idima. Namanaki tupuwisi kovogha namada ipanani da irabobo, taraboga iveresi da mikeda kanumisi ina yawasa.

God ina puyo na takoyagha bubuni.

⁷ Mara damona gisina kava ina nekiibau. Tuna kubiine nota yagharinai kovi potepote meyemi da mara nonowa kona niponipowana. ⁸ Ma bera ghamanakina na weni, nuwanuwami kudubinai turaturami yavata kovi nuwaviinavivirana, iyamna nuwaviina ina rewapano irakata da berabero ighekuyowei.* ⁹ Nuwabiibiiyai wawaya korutini da gwabimiyai ina kam bo ina kena ma nani kamonai ke kona vonakunukunura. ¹⁰ Wawaya sago sago duma kami puyo bogii ma bogiiyai God gwabinai koviiya ma ere nuwagiurimi kami puyo kokoyagha bubuni da wawaya koni vitesi da God ina agabuibai koni debei kurisi. ¹¹ Ma tam God ivinem da vonana kuna dimei, bo? Vaghina, kedima. Ma God ina kayowanai kava kevi sisiya.

* **4:8:** Prov 10:12

God ivinem da wawaya kuni vitesi ma kubiisi kuna biga, bo? Vaghina, kevi vitesi. Ma rewapana God gwabinai kuviiya na tuna tepanai kebiga kirakai. Nakanani kona berai na Yesu Keriso avanai wawaya i vigheghena ghamana God kuringa ina ghae. Tuna rewapana ma kadara kudubina rapenai, karako ma mara nonowa. Amen.

Keresiyana i vokwarakwara.

¹² Turaturaku, tami nuwanuwaku. Vokwarakwara damina koviiviya na ke kona veyiyei, iyamna ami vitumaghana eruburubui. ¹³ Tuna kubiine ke kona nota kavakavai, ¹⁴ ma kovi nuwabiibiiyei da ikikava Keriso ivokwarakwara na tami yavata kovovokwarakwara patapata. Ma mara sago kana kadara ini debei na nani maranai ami nuwabiibai ina rakata kirakai. ¹⁵ Keriso koitumaghanei kubiine, wawaya ini avaberowemi na kovi nuwabiibiiyei, iyamna Kanuma kadakadarina gwabimiyai, tuna na God Kanumina. ¹⁶ Ma kokitaruvimi da avi kubiine vokwarakwara kopanapanani. Ke meyani kona kiivunuwa, bo kona yapi, bo koni kayotirana, bo kona turaghegheyana da kovogha ina veremi da vokwarakwara kona panani. ¹⁷ Ma tami kovi Keresiyana ma mikeda wawaya ami vitumaghana kubiine ina vivitupaketowanemi ma kona vovokwarakwara na ke koninimaye. Ma God kovi ghegheni da Keriso kana vava iveremi da tami rapenai.

¹⁷ Vitupavira kana mara inenekiibau na tota God natunatuna na tinao da ini tupavireta. Ma iyavo kava God varana biibiina ke ita vovotekatekei

na ini muri ini tupaviresi ma ti na nuwapoya
ghamanakina ina panani. ¹⁸ Giruma katamana
evonavona bo,

“Ibagibagi kirakai da wawaya maninisi yawasa
makamakii nonowina ina panani,
tuna kubiine iyavo kava God ibarei bo be-
rabero eberaberai, ti na ikikava?”*

¹⁹ Ma vaghina, iyavo kava God ivinesi da
ita yokwarakwara na bera biibiisi ke ina voterei. Ma
God iyamonisi na tuna iti tumaghanei da iti vitesi,
iyamna aviyavisina evonavona da ita berai kubiisi
na ina tupuwa.

5

Keresiyana kii vinoraveraveyana kii sisiya.

¹ Tami Keresiyana kii vinoraveraveyana na
kami sisiya na weni. Taku bade na Keresiyana kii
vinoraveraveyana, ma Keriso ina yokwarakwara
aimamatarei wawaya kurisi. Ma bade akovi da
mara sago kana kadara ini debei na ku kamona
ana rui. Tuna kubiine aku rewapano emakamakai
da ani nowi kurimi da ² ami biga kona bera bubuni.
Keresiyana na nakanani ma God ina sipu yavona.
Ma tami na ami biga iveremi da kona koyagha
bubunisi. Ina kayowana da nuwabiibiiyai ma
nuwanuwami kudubinai ere vokuyayimi ami
biga kona berai wawaya kubiisi, ma ke mura
kona matighei.* ³ Ma iyavo kava ku imami iteresi
da kota koyaghisi na ke meyani da kona kayotata
kurisi. Ma ami yawasa na maninina kavakava da
konu matakira bubuna kurisi da ikikava ina makai.

* ^{4:18:} Prov 11:31 * ^{5:2:} Jon 21:15-17

Nakanani koni nowesi. ⁴ Tami babadimi na kami koyakoyagha ghamana emakamakai, tuna na Keriso. Tuna kubiine ami biga kobera bubuni da maranai tuna wawayina ina vovira ku dobu na ini gheghenimi ma kraun kadakadarisi ku gayamimi ini tawanepeyana. Ma nani kraun kadakadarisi na ke meyani da ina wapa.

⁵ Tami yaraga, kudubimi na kovi vaghinei da kami vinoraveraveyana ini bademi ma kovotekatekesi. Ma tami iyavo kava koitumaghana na peyarimi ere voyaghotimi turaturami kubiisi kona biga, iyamna “God na kayotatasi emiimiiripotesi ma vovoyaghotisi na ina agabiibai evereveresi.”* ⁶ Tuna kubiine kovokuwaya meyemi da God rewapania kirakiina ina rewapania gaburinai kona makai da mara sago ini gheghenimi.* ⁷ Ma ami nuwapoya kudubina God ku imana koterei, iyamna tuna edogadogarimi.

⁸ Kokitaruvimi, ami nota evi rewapania. Kami ghaviya Devil mara nonowa taraboga iekwekwai da ina vowimi. Tuna nakanani ma layon kayakayayina dipiiyai eyebayebagha, kana siya ekwekwai da ina kutasikasikai ma ina kam yavui. ⁹ Ami vitumaghana tepanai kovi tepatora da Devil komiiriopotei, iyamna koakovi da ikikava kovo-vokwarakwara na Keresiyana turaturami dobu ku kudubina na bade nakanani evovokwarakwara. ¹⁰ God ina agabiibai irakata ma ikwatumii da Keriso avanai kana ku kadara makamakii nonowina kona rui. Mara gisina kava

* **5:5:** Prov 3:34 * **5:6:** Mat 23:12; Luk 14:11, 18:14

kona vokwarakwara ma nani murinai tuna mani ini vitemi da ku biibiina ina teremi, ina kiiepepimi ma rewapana ina veremi da kona miirikikina.
11 Rewapana kudubina God rapenai, karako ma mara nonowa. Amen.

Vikiikiwi turina.

12 Varesita Sailas na wawaya patupatutuna, ma tuna ivi viteku da weni sisiyina tupona agirugirumi kurimi. Agiruma da ata kiiepepimi ma ata vonaveremi da namanaki biibiina bo berona ina tupuwa ma kegha da God ina agabiibai mara nonowa gwabimiyai emakamakai. Tuna tepanai komiirikikina.*

13 Babilon* kamonai na natuku Mak ma iyavo kava God ivinesi da ina wawaya na peyarisi iki-ikiwemi.* **14** Tami kamomiyai kovi kiikiwavivirana da ami nuwanuba gwabimiyai ina makai.

Iyavo kava Keriso yavata koinuwasa go na ain-owi da ina nuwanuba gwabimiyai ina makai.

* **5:12:** Apos 15:22, 40 * **5:13:** Babilon: Pita ivi miiba da vitumaghana damsí Rome kamonai ivi sisíyesi. * **5:13:** Apos 12:12, 25, 13:13, 15:37-39; Kol 4:10; Prm 24

**Gapapaiwa New Testament
The New Testament in the Gapapaiwa Language of
Papua New Guinea
Nupela Testamen long tokples Gapapaiwa long Niugini**

copyright © 2009-2018 Wycliffe Bible Translators, Inc.

Language: Gapapaiwa

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-11-07

PDF generated using Haiola and XeLaTeX on 22 Feb 2024 from source files dated 31 Aug 2023

02820c89-25a2-533d-9e19-9a2d0e178860